

# Facebook al fevele ancje par furlan

*Un projet che al infuartîs il sens di identitât dai furlans di dut il mont, nassût de colaborazion tra Meta, Regjon, INSIEL e ARLeF*

Facebook al fevele ancje par furlan: cumò si lu pues sielzi tant che lenghe de interface dal social plui innomenât e doprât dal mont (doi miliarts i utents atîfs ogni dì a nivel globâl).

In bande dal potenziament de presence de lenghe furlane sui social networks, di fat, il "Plan gjenerâl di politiche linguistiche pe lenghe furlane 2021-2025" al previôt ancje la sô difusion te esperience di ûs des platformis tecnologjichis principâls. In cheste suaze si è zontât il projet nassût de colaborazion fra la Regjon Autonome Friûl-Vignesie Julie, la ARLeF, INSIEL e il colòs statunitens Meta Platforms, proprietari ancje di Instagram, WhatsApp e Messenger. Il projet al è stât presentât te sede de Regjon, a Udin, di **Sebastiano Callari**, assessôr regionâl ai sistemis informatîfs; **Pierpaolo Roberti**, assessôr regionâl aes autonomiis locâls; **Diego Antonini**, president di Insiel; **Rosa Cialini**, Government & Social Impact Director di Meta in Europe meridionâl, Medi Orient e



Afriche; **Eros Cisilino**, president de ARLeF.

La traduzion par furlan di Facebook e rapresente un câs di ecelence a nivel globâl pe promozion des lenghis minoritariis intes tecnologjiis. Il projet si è inviât cun Insiel, la

societât ICT in house de Regjon, e al è lâf indenant cu la ativitât di traduzion de ARLeF, che e continuerà par restâ simpri inzornâts cun chest imprest in evoluzion continue.

«Chest risultât al è straordenari, e si zonte aes tantis iniziativis puartadis indenant vie par cheste legjislatore par un ûs pandût de marilenghe, di fevelâ no dome in famee ma in ducj i contescj». Chestis lis peraulis dal assessôr Pierpaolo Roberti, adun cul assessôr Sebastiano Callari.

«O metin a disposizion di ducj un altri strument che nus permet di doprâ la lenghe te cuotidianitât - al à marcât il president de ARLeF -. Cun di plui, doprâ la interface di Facebook par furlan al da un contribût par insaldâ il sens di identitât e di comunitât dai furlans tal teritori e tal mont».

La version furlane si le podarà selezionâ, pal moment, inte version web. Pe app si varà di spietâ, par vie che lis lenghis di podê selezionâ a son une vore pocjîs.

## Salve une vite! il video che al rive al cûr dai zovins

YoupalTubo al è un canâl YouTube une vore preseât dai zovins (si contin passe 9.800 iscritti e plui di 28.000 oris di visualizazion), là che un grup di fantats furlans a contin lis lôr passions, zontant storiis e curiositâts sul Friûl. Cul video "Salve une vite!" a àn volût metisi in zûc suntun teme rilevante: trasmeti la impuartance di salvâ une vite graciis ae donazion di medole dai vues, cuntun messaç che al rive al cûr dai fantats e des fantatis fra i 18 e i 35 agns e in buine salût. La colaborazion fra la ARLeF, la clape di YoupalTubo e AdMO Fvg «e vierç un canâl di dialic cui zovins che al partissi propit di lôr» - e à marcât **Paola Rugo**, presidente de Admo Fvg che e je impegnade sul teritori intune vore di ativitâts, tant che lis cunvignis intai istitûts scolastics -. I fantats a àn realizât un clip che e fâs capî che notâsi tal registri dai donadôrs al rapresente un at di gjenerositât e une grande pussibilitât, ven a stâi chê di salvâ une vite. O dîs graciis ae ARLeF e a lôr par cheste oportunitât e o invidi ducj a cjalâ il video tal canâl YoupalTubo, par savê di plui».

«O sin une vore braurôs di cheste colaborazion preziose cun Admo Fvg - al dîs il president de ARLeF, **Eros Cisilino** - che fevelant dal donâ midiant de lenghe furlane e vûl judâ a inressi la sensibilitât dai zovins».